

**Sang President
Dieter F. Uchtdorf**
Sounsawas Keriau nan
Presidensi Keieu



Alialu nan Pwonopwon Kan

Kumwail rongehr lepin mahseno me aramas me salongalahr kin alialu nan pwonopwon kan? Jan L. Souman, mehn Sehmen me kin onopki madamadau en aramas, men diarada sang ni koasondi en science ma met pwung. E wahla aramas kei ong nan wahl lapala ehu oh nan sapwtehn en Sahara oh ohlo eri doadoahngki soahngen kampiuder ehu me kin kak kasalehda ia wasa aramas akan kohkohseli ie ansou koaros. Sohte kampes de pil ehu soangen dipwisou en sawas reh rail. Dahme re pahn wia me mengei: re pahn aluh inen lahngte wasa me idihdieng irail.

Dr. Souman ahpw kawehweh mwuri dahme wiawi. “[Ekei] irail alu nan rahn ehu me edied, ketipin rirla mwurin depwek kan [oh sohte mehkoht me re kak kilang pwe ren kak esehki ia wasa re mihmi ie]. . . . [Irail] koaros alu nan pwonopwon kei, oh [ekei] irail sasairki me re pwurehng alu wasa me re aluhier mwowe.” Aramas teikan alu pahn ketipin, oh mie mehkoht doh me re kak kilangki ia wasa reh mih ie. “Aramas pwukat . . . idawehn ahlpwot me kereniehg inen mehlel.”¹

Mie me wiahier songen ropirop wet ahpw ni soangen wiepe me weksang metakan.² Dahme pwarada nan ropirop koaros duwepenehte.

Ma sohte kilel en kaweid ehu me sansal , aramas kin uhdahte alu nan pwonopwon kan.

Irehn Pwuhk Sarawi Kan wia Kilel en Kaweid

Ma sohte kilel en kaweid pali ngehnkan, aramas pahn wie kohkohseli mwahl. Ma sohte mahsen en Koht, kitail pahn kin alialu nan pwonopwon kan.

Pein kitail oh ni atail kin patpene, kitail kin kilang soangen mwekid wet nan irair en mwehi koaros sangete tepin ahnsou. Ni atail kin sohla kilang mahsen en Koht, kitail kin salongala.

Ele iei kahrepe wet me Kauno poahngokihong Lehi en kapwurehla nah pwutak kan Serusalem pwe ren ale sleiht prahs kan. Koht mwahngi me kadaudok en Lehi pahn anahne kilel en kaweid mwahu kan—dipwisou en kairoir kan—me pahn kaweid irail pwe irail en kak ese ma re ideidawehn ahl me pwung.

Irehn pwuhk sarawi kan iei mahsen en Koht. Re wia sapwelimen Koht kilel en kaweid me kin kasalehda ahl me kitail anahne idawehn pwe kitail en kereniong atail Sounkomour oh ale wahn atail doadoahk kan.

Kilel en Kaweid en Tiepene Lap

Sakarada kan me kin wiawih nan tiepene lap pil wia ehu kilel en kaweid me kak sewese kitail en ese ma kitail ideidawen ahl me pwung.

Ekei pak I kin pein peidek rehi, “I rong mahsen me ohl oh lih akan kapahrengki nan tiepene lap en Mwo-mwohdiso me apwtehn wiawih? I wadek oh pwureng

wadekehr arail mahsen kan? I medewehier oh doahngkiher nan ahi mour? De I perenkidahte arail kapahrek kaselel kan ahpw sohte kin doadoahngki arail padahk kamarain kan nan ahi mour?”

Mwein mie mehkot kumwail ntingihedi ahnsou me kumwail rong de wadek, kapahrek kan. Mwein kumwail inoukihda kumwail en wia mehkoht mwahusang de weksang mahs. Medewe duwen padahk kan sang tiepene lap me apwtehn nek o. Dihr me koangoange kitail en kakehlailiala atail peneinei kan oh kamwahu-iahla nan pwungen pwopwoud kan. Nan makasih en *Liahona* pil koasoia duwen padahk soutuk pwukat, iangahki karasaras kei me kak kapaiada atail mour kan.

Kitail kin kilelehdi oh momourki padahk kesempwal wet? Kitail kasawiadahr oh alialu kohlahng kilel en kaweid kesempwal oh mehlel pwukat?

Sewese Kauhdi Kohkohseli Mwahl

Kilel en kaweid pali ngehn wia mehkot kesempwal ong sewese kitail dadaur nan ahl me inen oh tehtik. Re kaweidada ni sansal ahl me kitail konehng seiloak ie—ahpw ihte ma kitail kak kasawiada kilel pwukat oh idawehn.

Ma kitail sohte men idawehn kilel pwukat, re pahn wiahla mehkoht sohte katepe, de mehn kapwat me sohte anahnepe.

E sohte itar kitail en idawehnte atail ineng kan.

E sohte itar mehnda ma atail ineng kan me mwahu.

E sohte pahn pweida ma kitail pahn doadoahngki dahme kitail kin pepehm te.

Mendahte ma kitail medewe me kitail idawehn ahl inen en pali ngehn, ma sohte kilel en kaweid mehlel en kaweid kitail—ma sohte sawas sang Ngehno—kitail pahn kin kohkohseli mwahl.

Kitail pedpeseng oh kilang kilelen kaweid me atail Koht sapan ketkihong Sapwellime serihkan. Kitail wadek, rong, oh momourki mahsen en Koht. Kitail kapakap ngidingid ni mehlel oh rong oh idawehn kaweid en Ngehno. Mwurin atail kasawiadahr kilel en kaweid kan me kolang rehn Samatail Nanleng me limpoak, kitail konehng idawehn ahlo. Kitail pil konehng kin kapwungala ahl me kitail kekeid ie pwe en kin pahrekiong kilel en kaweid en ngehno.

Sang ni mwohmw wet, kitail sohte pahn pidipidekseli nan pwonopwon kan ahpw kitail pahn alu

ni koapwoaroapwoar oh likilik ong kapai kaselel en nanleng me wia sohso ohng irail koaros me momourki Krai oh alu nan ahl inen oh tehtik.

IREN SAWAS AKAN

1. Tehk Jan L. Souman oh mehteikan, “Walking Straight into Circles,” *Current Biology*, vol. 19 (Septembe 29, 2009), 1538–42.
2. Tehk, ni karasaras, Robert Krulwich, “A Mystery: Why Can’t We Walk Straight?” npr.org/blogs/krulwich/2011/06/01/131050832/a-mystery-why-can-t-we-walk-straight.

PADAPADAHK SANG IREN MAHSEN WET

Ni omw onopiki pwe ken padahngki iren mahsen wet, komw kak rapahki nan pwuhk sarawi karasaras kan en aramas me idawehn kilel en kaweid en pali ngehn pwukat de aramas me pidipidekseli nan pwonopwon kan. Komw kak tepda onopiki ire pwukat: Nemp Kan 14:26–33; 1 Nephi 16:28–29; Alma 37:38–47. Ma komw aledhi pepehm, komw kak ehukihda dahme komw esehda sang karasaras pwukat ong irail me komw kin kasikuhli. Pekida rehail dahme kitail kak esehla sang soai pwukat.

ME PWULOPWUL KAN

Kilel en Kaweid Ong Komwi

President Uchtdorf kawehwe me tiepene lap oh irehn pwuhk sarawi kan wia kilel en kaweid me sewese pali ngenitail en dehr pidipidekseli mwahl. Medewe kilel en kaweid en pali ngehn teikan me kin seweseiuhk oh kaweiduhk nan ahmw mour. Ntingihdi irair kan me ke loieng nan noumw pwuhk en poadoapoad. Mwein mahsen pwukat sang President Thomas S. Monson pahn seweseiuhk:

“Ahmw kapai en patriark pahn seweseiuhk ni pwohng me keieu rotorot. E pahn kaweiduhk nan kahpwal akan en mour. . . . Ahmw kapaio sohte wia mehn limilimpene ni keneinei oh nekinekila. E sohte wia mehn kohieng nan kilahs oh langada de ntingda nan pwuhk pwe koaros en wadek. Ahpw, e wia mehn pein omw wade-wadek. E konehng en wia mehkot me kitail poakohng. E wia mehkot me kitail en idawehn.”

“Your Patriarchal Blessing: A Liahona of Light,” *Ensign*, Nopembe 1986, 66.

“Samatail Nanleng sohte kak kadar kitail ong seiloak soutuk wet ma E sohte ketkihda mehkoht me kitail kak doadoahngki pwehn ale kaweid oh sewese kitail

pwurala reh. I koasoia kapakap. I pil koasoia mwe-ningingin me kolang ngihl tikitiko.”

“The Race of Life,” *Liahona*, Mei 2012, 92.

SERIHKAN

I Kak Diar Ahi Ahlo

President Uchtdorf nda me kitail anahne idawehn kilel en kaweid en pali ngehn pwehki re pahn sewese kitail pilada me pwung oh kerenihong Sounkomouro. Ekei kilelen kaweid pwukat iei kapakap, irehn pwuhk sarawi kan, tiepene lap, oh *Liahona*.

Wadek ehu padahk sang tiepene lap me apwtehn nek ohng ahmw peneinei. Dahme sounpadahko kaweidki kitail en wia pwen dadaur nan ahl pwungo? Koasoanehdi rehn ahmw peneinei mwohmwen amwail pahn momourki dahme kumwail esehlahr.



Pwoson, Peneinei, Sawas

Popohl nan Poadoapoad en Peneinei

*Onopiki ni kapakap iren mahsen wet oh, ni eh pahn konehng, koasoiahkihieng lih akan me komw kin pwarek. Doadoahngki peidek kan pwehn seweseikomwi kakehlai-
lih riomw lih akan oh pwehn elehieng Pwihn en Sawas en Lih en wiahla pali kesempwal
en pein ahmw mour. Pwehn alehdi iren kapehse kapatapap, tehkreliedsociety.lds.org.*

Elder Russell M. Nelson en Pwihn en Wahnpoaron Ehk-Riemeno padahngki me Ngehn en Elijah wia “kile enNgehn Sarawi ehu me kadehde duwen wahu oh sarawi en peneinei.”¹

Ni atail wia tohn Mwomwohdiso me Krai ketin kapwurehdo, atail inou en pwukoah iei en rapahki kadaudokatail oh kihoang irail tiahk sarawi en rongamwahuo. Irail sohte kak “unsekla” ma sohte kitail (Ipru 11:40), oh pil kitail sohte kak unsekla kelehpw ma sohte irail me mehlahr (tehk D&C 128:15).

Doadoahk en poadoapoad en peneinei kin kaunop kitail ong kapai kan en mour soutuk oh sewese kitail en kalaudehla atail pwoson oh mour pwung. Poadoapoad en peneinei wia pali kesempwal ehu en doadoahk en Mwomwohdiso oh kin elehda doadoahk en mour soutuk ong koaros.

President Boyd K. Packer, President en Pwihn en Wahnpoaron Ehk-Riemeno, mahsanih: “Ni atail

rapahki en esehla duwen pein atail kadaudok kan kitail sohte kin nsenohki mwahr kan te. . . . Nsenatail kan kin kapirehr mohngiongatail ong atail pahpa kan—kitail kin men diar irailda oh ese iraila oh papah irail.”²

Sang Pwuhk Sarawi Kan

Malakai 4:5–6; 1 Korint 15:29; D&C 124:28–36; 128:15

Sang Atail Poadoapoad

Soukohp Joseph Smith padahngki, “Pwukoah keieu kesempwal nan sampah wet me Koht ketkihong kitail iei en rapahki irail me mehlahr akan.”³ Kitail kak papah nan tehnpas sarawi weliandi kadaudokatail me mehlahr akan oh wia tiahk sarawi me anahn ong irail.

Sally Randall mehn Nauvoo, Illinois, nah pwutak me sounpar 14 mehlahr, diarada nsenamwahu pwehki inou en peneinei soutuk. Mwurin ah pwoudo weliandi oh pepdaiskila neira pwutak me

melahr, liho nting ong ah peneinei: “Ia uwen kaselel me kitail . . . kak weliandi oh pepdaiskila kadaudokatail me mehlahr koaros oh komourala koaros me kitail kak diar.” E uhd pekihda rehn ah peneinei en kadarla eden kadaudokarail kan oh, nda, “I men wia uwen ahi kak en komourala [atail peneinei].”⁴

IREN SAWAS AKAN

1. Russell M. Nelson, “A New Harvest Time,” *Liahona*, Sulai 1998, 34.
2. Boyd K. Packer, “Your Family History: Getting Started,” *Liahona*, Nopempe 2011, 17.
3. *Teachings of Presidents of the Church: Joseph Smith* (2007), 475.
4. *Tehk Daughters in My Kingdom: The History and Work of Relief Society* (2011), 20–21.

Dahme I Kak Wia?

1. I duwen ahi kak sewese lih akan me I kin pwukoahki en wia poadoapoad en peneinei?
2. I kin ntingihdi pein ahi poadoapoad?